

Koolitee jätk linnas

Ale õks käve mitmõ^q kooli^q,
viil kuvvõ^q veerätelli.
3920 Õgal läts´ õks kõõ talvõl targõbast,
õgal kuul korgõbast,
Alel läts´ õks kõõ hiuss hiitrapast,
kõrvajuurõ^q julgõpast:
seto oll´ ka õks küll poisil selge kiil,
3925 selge kiil, märksa miil,
kiil olli õks kõõ kipõ kirotamma,
miil märksa mark´ mähe.
Oll´ õks täl huul oppeh,
muudsa murõh murrõldõh.
3930 Kooli-õks-kui-herr kullutõlli,
klassitätä kadsatõlli,
küsse õks kui pääs´ o päätükkä,
risteliidse rehkontõ*,
Ale õks kõõ lugi inne muid,
3935 arvas´ muist aiksappa.
Inne sai õks sis muid muudsa* poiss,
inne aigo ausa miis.
Hiitrusõ^q* õks täl olli^q hiussõh,
viguri^q kõrva veereh.
3940 Puul timmä õks kõik liina leelotõlli,
esändä^q imehtelli^q,
seto saasõ õks et poisist ploomna* poiss,
tuhn´a* pujast tukõv miis,
kõik kit´vä^q õks et Alet kirämehe^q,
3945 kooliherrä^q kulusahe.
Kirä^q olli^q õks täl muista kimmäpä^q,
paprõ^q muista pareba^q.
S´oo tekk´ õks kõik pääs´ o pääkene,
Ale märksa meelekene.
3950 Ale-õks-kõist velekeist,
kulla koolipoisikõist –
Ale nakas´ õks jo tükmä tüdengest,
kulla ülikoolikõistõ,
liina nakas´ õks jo pite liitmähe,
3955 turgo pite toukamma.
Liinah näkk´ õks tä näiot lilli näko,
turuh näiot Tuula suku.
Ale nakas´ õks jo käümä käest kinni,
sõudma sõrme nõal,
3960 piirmä nakas´ õks jo pidomajjo piti,
läts´ kulla kul´anjahe.
Tundma nakas´ õks tuud näiokõist,

sald´ma saapaseerekeist,
määnest opas´ õks tälle or´a-ese,
3965 kasvotätä kadsatõlli.
Tuu sai õks ka Ale meeleline,
meelest meelega peräline:
üte- olli^q õks nää^q –ilosa^q mõlõmba^q,
üte veerüsä verega.
3970 Näil massi^q õks küll sarna^q mito sata,
verekipõn´ viiskümmend.
Alel joosi^q õks sis üteh hüä^q jutu^q,
sõidi^q sõpro sõnomõ^q.
Ale ost´ õks jo tälle kuldakosti,
3975 mitmõ^q mesileeväkese^q:
mesi- timmä õks kõõ –leeväl meelütelli,
karameel´kil kabistõlli.
Ale ost´ õks kõõ mõtu mõrsjallõ,
sal´dus-viina verevät.
3980 Üte^q olli^q õks nää^q juuja^q mõlõmba^q,
makõ viina maitsjani:
Ale juu-s õks ar umma meelekeist,
pääs´ o umma pääkeist,
Ale jätt´ õks küll meelega kodo minnä^q,
3985 jätt´ pää pääle saia^q.
Liinah õks nää^q toukse tuu jutu,
alõvoh arma sõna,
Ale õks eis´ Taadsilõ üteli´,
mõrsjallõ mõistutõlli:
3990 “Taads, olõt ka õks sa tark näiokõnõ,
kavval imekanakõnõ,
küll ma õks küll, Taads, sinno taha –
kas sa Alet armastõllõt?”
Ale õks sis lausi meelestäni,
3995 meelest, meelega poolõstani:
“Kas minnä^q õks mul sinnä pühapääväl
vai minnä^q neläpääväl?”
Taads õks sis targastõ üteli´,
kavalaha kadsatõlli:
4000 “Kutsma õks ma naka-i, ar ka aja-i!
Om õks sul luba hindä käeh,
tõõnõ luba tõõsõh käeh.”
Ale õks sis as´ast arvo sai,
Taads jutu juundõ pand´.
4005 Ale õks sis jätt´ tervest,
and´ käe kärmähe.